

四庫全書

集部

欽定四庫全書

集部

御訂全金詩增補中州集卷五十八

詳校官中書

臣張虎拜

主事銜

臣徐以坤覆勘

總校官編修

臣

王燕緒

校對官編修

臣

勵守謙

謄錄監生

臣

黃嘉績

欽定四庫全書

御訂全金詩增補中州集卷五十七

段克已下

馮弟自北山來出其舊所為詩百餘篇雖未暇盡  
讀嘗鼎一臠足知餘味吾弟離羣索居無師友之  
益能自道其所志蓋絕無而僅有者也雖然掘井  
九仞而不及泉猶為棄井耳適漢臣張君見過論  
文話舊以及吾弟之賢因作詩許其所已能而勉

其所未至以寄之幸時復觀覽以自警省勿徒實  
篋笥而已

少年事業莫蹉跎聽我樽前一曲歌鑄劍必期經百鍊  
為文故自要三多凡胎須得丹砂換壯志休辭鐵硯磨  
平地為山由一簣詞源他日看傾河

讀張志和傳

一葉輕舟一釣綸朝廷無處覓玄真太虛明月為知己  
細雨斜風不着人西塞貪看飛白鷺東華忘却軟紅塵

還思擾擾馳名者肯信人間有逸民

雄飛亭主人張君器之有龍庭之行賦詩為餞

千丈虹霓卷壯圖幾回彈鋏歎無魚南溟久滯垂天翼  
北闕誰飛薦鶚書投筆尚希班定遠題橋終遂馬相如  
浩歌若過燕山市為我登臺弔望諸

蘭文晚節軒

晚歲誰能識此君一官不復任浮沉蟄龍未起三冬卧  
老驥猶存萬里心陶令不來樽有酒嵇康已逝室無琴

橫溪文字光千古舊有新詩播士林

壽縣大夫薛寶臣

薛姓蟬嫣自古分君侯苗裔萃其門已聞佳績多前古  
更溢餘波及後昆久屈祥鸞棲惡枳稔推利器遇蟠根  
徵書未至身閒暇且看樽前舞袖翻

九日山園小宴取五柳公采菊東籬下為韻賦詩  
侑觴

世無李元膺誰容孔北海長歌歸去來籬菊無人采

古來賢哲人餓死填空谷清樽幸不空且醉籬邊菊  
風雨山城暮黃華自滿叢幽懷君為寫正要玉西東  
愛酒陶元亮持杯對菊枝醉時推客去猶復有籬籬  
飢食秋菊英采采不盈把日落四山昏獨坐衡門下

仲冬之初家弟誠之自芹溪得紅梅數枝作三詩  
以見意夜歸枕上次韻簡山中二三人

十月梅花春未知竹間璀璨出斜枝耐寒巧作新妝面  
絕勝含章簷下時

顏色馨香幾箇知叢篁深處見橫枝孤標祇得詩人愛  
華樣而今不入時

梅格孤高只自知恥隨桃李鬪新枝天寒翠袖依修竹  
却在橙黃橘綠時

盧希顏草蟲橫披

苦竹黃蘆相並枝秋蟲瀟灑弄幽姿畫師老筆生新意  
寫出無聲七月詩

梅花六詠



夢

天仙邀我醉瑤臺  
春向飛瓊笑裏回  
為報梨花緣已斷  
休將雲雨下山來

尋

風流誰似李三郎  
不記仙姿委路傍  
天上人間無覓處  
風來羅幕只聞香

探

號國夫人約素身  
不教脂粉浣天真  
一斑曾向春前見

顏色如今更可人

乞

寄語詩人林隱君水西千樹要平分玉顏絳領堪娛老  
御史何勞覓紫雲

浴

脉脉晴天翠幕張玉環月底按霓裳却嫌塵污香羅襪  
故着溫泉為洗妝

惜

窈窕銀屏掩畫堂為嫌玉瘦怯昏黃落英猶可為香蕪  
不學翔風老退房

花木四詠

海棠風

玉妃酒暈透香肌滿頰嬌紅睡起時小立沉香亭子外  
釵橫鬢亂任風吹

楊柳烟

舞罷霓裳醉似泥六宮誰許鬪腰肢侍兒扶立嬌無力

雲母屏深午醒遲

葵花日

曉日穿花透翠帷  
環兒軟語訴分離  
髮膚之外皆君賜  
妾自傾心君不知

梅花月

蓬島春寒減玉肌  
却憑羽客寄相思  
憑欄私語長生殿  
惟有當時好月知

退之留別大顛圖

吏部文章日月光平生忠義著南荒肯因一轉山僧語  
換却從來鐵石腸

漢陰抱甕圖

鑿井為畦並漢臯區區抱甕不辭勞古人伎倆今人笑  
舉世師師尚桔槔

壽衛生襲之

去年即席賦新詩今歲迎門把酒卮似此相逢能幾度  
莫教虛負百年期

為龍門史師壽不遇

香霧霏霏曉未開一樽特地為君來  
仙翁落魄知何處貪醉蟠桃不肯回

楊生彥衡袖初夏三數詩過余徵和  
雖勉強應命格韻枯槁深慚見知

枝頭梅子半傳黃門巷陰陰午景長  
為語兒童休報事乃翁方且作詩忙

刁騷短髮半垂黃深覺閒中意味長  
買得溪山猶是錯

往來杖履却成忙

薔薇經雨墮輕黃芍藥翻階竹筍長  
年少往來常不住  
恰如蜂蝶為花忙

案上新經未入黃風簾不動篆烟長  
須知靜裏乾坤大  
不覺飛空日月忙

奏賦當年對赭黃漁樵今日語偏長  
青山綠水無窮意  
始信人生空自忙

酒熟江村擘蟹黃論詩看劍引杯長  
閒身嬾散無拘束

笑殺君房醉裏忙

老來閉口罷雌黃  
書卷慵拈白日長  
門掩東風無客過  
不知人世有閒忙

不求紆紫與懷黃  
竹杖芒鞋野興長  
信步芹溪溪上路  
楊花又是一番忙

晨興賞玩抵昏黃  
晝短其如夜苦長  
秉燭醉歸君莫怪  
一生能得幾回忙

蟾蜍詎可逐飛黃  
雲海茫茫去路長  
世外仙方無分得



漫勞心力一生忙

送雙白渠使梁君二子北上

連壁雙飛二鳳毛  
眼明又復識英豪  
鸞聲嘒嘒朝天日  
想有新詩奪錦袍

送故人子赴燕

莫謂城南尺五天  
此行幾日到幽燕  
昂霄聳壑從茲始  
萬里青雲穩著鞭

壽家弟誠之

贈君以湘山桃竹之杖酌君以昆丘玉液之泉泉以益  
肺腑之清氣杖以扶貞節於暮年廼命童子敬設几筵  
抽中山秋兔之毫舒浣花五色之牋滌端溪兔肝之硯  
磨伊川老松之烟遂含情而抒思寫棣萼之新篇諸君  
聽我歌歌聲咽塞意不傳玉堂金馬在何處姑山汾水  
空連綿世人所後我所先此生安得不迍邐但能道義  
追淵騫何妨坐客寒無羶鳥棲深林魚泳淵膏以其明  
還自煎文字點勘費丹鉛朝夕胡為粥與饘百年飄忽

如流川今日已覺昨日賢青州從事殊可憐徑須呼至  
黃花前一酌入口百憂捐與君曝背同醉眠

贈醫者呼延生 并序

外醫之名非古也今人徒見瘡瘍發見於皮膚之外  
針砭可得而攻之因謂之外醫然則解肌剖腹瀦洗  
腸胃漱滌五臟者其亦外醫耶殊不知聽聲視色察  
氣觀脉以知病之所在湯熨以治其腠理針石以達  
其血脉酒膠以蕩其腸胃扶虛疏實抑過補僊疾無

不起者今呼延生之療疾也湯劑砭灸各隨所施無不立愈嗚呼非得之於內應之於外烏能取效如此其速乎生喜飲酒人之所酬無厚薄不以介意一寓之酒其真得於酒耶余賢其為人故賦詩以贈之

君不見南齊潘聚師禁耳出箭鏑又不見唐人孫翬生祝石使相擊祝溪溪不流操術如破的以樹徙癰疽伯宗多偉績後來便說呼延生神異一時無匹敵誓言拯衆疾猶已有飢溺吐氣作雲霓掉舌飛霹靂炎涼隨手

變衆苦已蕩滌百謝不一顧黃金同瓦礫飲酒過斗餘  
醉不遺涓滴歸來掩關卧瑤琴閒挂壁所至以義合無  
莫亦無適衡門時見過笑語慰岑寂却愁仙籍告功成  
便恐人間無處覓

史伯友好禮齋

禹門山壁石巖嵒驚濤拍岸石疑動奔騰西去疾於飛  
千里一折不旋踵山水不得獨當奇異氣鍾人生將種  
乃翁陰德及後昆墓木而今猶未拱大兒膂力號絕人

挾樂彎弧賈餘勇小兒精神大於身野鶴乘風欲高聳  
人物風流此一時坐使山河價增重讀書已能了大義  
稼穡還知依畝壠孰謂人間杞梓材肯與樗櫟同臃腫  
良心一變不可遏油然而上若泉湧悅親誠身固有道  
不得乎友深自悚一毫驕氣不可作好禮名齋心益竦  
數陳几席待佳士却掃門庭謝凡冗善言亟聞聞必拜  
未之能行復惟恐結襪何嘗愧古人親詣仍能越常奉  
慎恭勇智威有節人偽不私無所壅汝之所得亦已多

更須道義相切磋佳時勸客金叵羅主人起舞客齊歌  
遯菴野叟鬢已皤坐中不覺醉顏酡六龍冉冉奔羲和  
年年事業毋蹉跎君其為我疾揮魯陽戈我亦挽君顛  
倒挽黃河他時策杖重來過更名此里為鳴珂名與西  
山俱不磨

贈薛寶臣疎梅凍雀圖并以頌之

玄冥司候百卉具衰此花獨秀於江之湄傲雪凌霜冰  
清玉潔孤根盤石凍柯浸月維彼寒雀婉孌相依飲香

啄藥生死不離歲暮貞心粲粲清節孰與薦延移歸金  
闕鳳鳥不至惡木日滋窮通有命舍是奚為

御訂全金詩增補中州集卷五十七



欽定四庫全書

御訂全金詩增補中州集卷五十八

菊軒段成已上

共二百零四首以下已借刻  
顧嗣立元百家詩二選中

補成已字誠之克已仲弟登金正大進士第授  
宜陽主簿克已歿後自龍門山徙晉寧北郭閉  
門讀書元世祖降璽書即其家起為平陽儒學  
提舉不赴年過八十優游以終世稱菊軒先生  
祭酒周文懿評其文在班馬之間河汾遺老之

卓然一門未有如段氏者也

吾兄同仲堅采鷺鷥藤於午芹之東溪因詠詩見  
示前代詩人未嘗聞賦此者此花長於田野籬落  
間人視之與草芥無異是詩一出好事者將知所  
貴矣感歎之餘敬次其韻有與我同志繼而述之  
不亦懿乎

微雨灑郊垌百卉欣並育幽花發溪側間錯金珠簇徐  
看是鷺鷥藤香味濃可掬忍飢出新句大笑負此腹遺落

榛莽間采擷誰見蓄情知無俗安安能悅衆目先生日  
來往東溪路應熟一經品題餘名字耀巖谷遇合良有  
時不才異山木

呂氏用靜齋

兩岸夾嵯峨一水中委蛇是間有高人靜與山林期結  
茅並溪石故迹司空遺因人愛其山佳處應自知心閒  
境隨勝眼靜山增奇寥寥丈室中日用夫何為不書吐  
咄事高詠休休詞無人書一編有興酒數卮便是一生

了安問著與龜依依中條雲夢想紫芝眉昨朝寄書至  
謂我來何時急營買山錢已覺從君遲他年兩繩牀分  
忍西山飢

蒲城董公予素不識其何如人也一日袖橫軸所  
謂龍窩圖者同仲堅見過而以詩見謁余雅不能  
文詩尤非所長者加之老病日久縱不避拙惡亦  
安能為他人椎肝腎邪渠請益堅余重違封意且  
念其勤姑因所見以叙之云爾

封生攜客來謁我蓬蒿裏軒軒抗塵俗不知誰氏子所  
主我既賢伊人亦云喜探懷出新圖一語煩舉似蹇余  
不能文三請意未已溪山有素期入眼盡其美層雲蔽  
重淵萬木夾兩溪飛流瀉絕壑千丈垂幅紙餘霏散如  
霧點滴亂紛委何物竅其旁相傳龍所止廟貌寄空山  
何代為經始年深祭血乾亂久誰復祀威靈昔所聞對  
面隔千里誠通感必應雖遠猶在邇巍巍窟宅尊安臥  
久不起何當洗甲兵倒挽幽溪水

余嬾日甚不作詩者二年矣問者二三子以歌詠  
相樂請題於吾兄邀菴遂以歲月坐成晚命之因  
事感懷成五章以自遣志之所之不知其言之陋  
也覽者將有取焉

負暄頽檐下病骨喜新霽微風動天宇木葉隕虛砌緬  
懷平生事奔走媿非計投身田野間心迹得少憩時榮  
豈不慕省躬自當逝薇蕨滿春山猶可以終歲

罷書掩闕臥憲牖亂清樾風枝驚宿鳥扎扎畏顛越葉

聲走前庭誤聽雨未歇不知霜已重但覺寒切骨耿耿不能寐起坐候明發試問夜如何虛檐轉殘月

晨起坐高齋烏啼幽寂破小兒具文墨信手供日課既無寵辱驚又不至寒餓自量亦云幸到此能幾箇更欲希世榮所望毋乃過蒲團正溫厚得穩且安坐

連蹇拙進宦艱難昧理生一事且不免况欲二者并忍窮分所安不為世所縈牀頭一卷書淨洗胸次平偶逢會心人款款話中情鉅儲喜不空今年賴西成

青山如有情向人呈偃蹇我本山人一出偶忘返崎  
嶇半天下始覺居山穩力極勢自迴苦不費推挽稅駕  
良自茲千里豈云遠舉手謝山英應笑歸來晚

陳子正容安堂

陳子少英邁逸氣不可挫典刑肖乃翁出語輒驚座行  
止非所能造物聽掀簸功名鷹在韝歲月蟻旋磨區區  
一邑一作室中十載供史課結廬慕淵明志向有許大澹  
墨寫形似終日相對坐一室足我容百念付慵惰青山



隱檐楹流水出其

一作階

左植花數十叢種竹千百箇事

來若機張事去如甌

一作瓶

墮浩然方寸間不受一塵泥

豈無二仲賢閒暇日相過有酒相獻酬有詩互賡和溪

山入笑談珠玉霏咳唾徜徉天地間一物莫非我醉來

語更真卿去我將臥主人正高枕

一作眠

山鳥莫啼破

### 崧陽歸隱圖

落落出世人視世猶糠粃獨惟愛山緣一念未渠已嘗  
行崧陽道經觀畧可紀有山皆孱顏有水盡清泚寒藤

絡古木奇花開芳枳風從四山下紅綠亂紛委雲日互  
蔽虧百態呈怪詭微泉不知處叢菁鳴宮徵山鳥忽驚  
飛花落空巖裏靜聞雞犬聲人家應在邇百年能幾日  
山間有餘晷孰知桃花源不出武陵水回首視人間囂  
囂足塵淖便擬結橡茅息息迫行李一來汾沮洳留滯  
綿幾祀幽懷渺難忘澹墨寄形似舊遊一經眼未往差  
可喜此心本無著夫宜為物使昔何從而來今何從而  
止脩然來往間於是得之子幻影竟安用我亦聊爾爾

一笑兩忘言庭花委階砌

送尋正道歸浦中

江頭

一作邊

楊柳才堪折陌上行人還又別春光不解苦

留人兩岸楊花飛白雪江風搖搖吹綠波欲別未別傷  
如何勸君且住聽我歌後日重來白髮多

松溪幽隱圖

何宮遺構山之隅長松蔽映千萬株中有一徑穿縈紆  
冷風蕭瑟無時無人間赤日如洪爐恍疑仙景來蓬壺

蹤跡一墮聲利區回首自覺泥塗污歲月因循歸計迂  
松溪想像勞形摸可憐塵夢今始蘇空對溪山慚畫圖  
一日來歸聊自娛

壽賈總管

紫髯茁頤膽滿軀胸懷落落真丈夫古稱山西士將種  
我公家世皆吾儒朝家未錄勛臣後時時射虎西山隅  
一官平水今幾年鄉間坐覺疲氓蘇驥塗千里會須展  
小邦未足勞馳驅繡衣錦帽不復見人言慙也終平吳

此時此日生鵷雛鬱蔥佳氣充公間當筵擊筑聲嗚嗚  
滿堂賓客聯簪裾天公催花為噓枯要及花下傾金壺  
春風花開人不孤年年人與春風俱

送王子壽之平遙

卜築謀南邁回轅遽北之有情慚見厚無語只空悲易  
忍行時淚難堪別後思明年鴈來日屈指數歸期

總管李侯移鎮京兆病久不能即門屏奉卮酒一  
賀為歉謹作拙惡以餞行軒

一扎飛書下日邊  
龍移方伯殿  
長安晉城父  
老心皆泣  
秦地奸豪膽已寒  
千里馳驅容驥展  
九霄空濶看鵬搏  
十年潦倒登門客  
臥病無由挽去鞍

送總管李侯北上

姓名合上郭公臺  
落落襟懷間世才  
飛騎屢朝天上去  
好音時向日邊來  
中心都為明時盡  
東閣常因好客開  
萬里鵬程從此始  
垂天雲翼看徘徊

辛丑清明後三日詩社諸君燕集於封仲堅別墅

談笑竟日賓主樂甚然以未得吾兄弟數語為不  
足既而遊菴兄有詩余獨未也主人責負不已賦  
此應命云

善惡人情已飽諳岸紗宴坐看晴嵐折腰不是淵明嬾  
作吏元非叔夜堪老去一觴猶有味病來萬事更何貪  
從頭悉讀行年記慚媿春風四十三

紅梅

誰點冰梢絳雪團黃昏和月倚闌干羞隨桃李爭春意

要伴松筠傲歲寒  
冷豔只宜閒處著  
淺妝難入俗人看  
天心未借和羹便  
空抱枝頭一點酸

送仲堅漢臣二子過南澗歸賦是詩

螻蟻微生脫怒濤  
一茅容膝儘逍遙  
宦情更比詩情薄  
日力聊憑酒力消  
心類候蟲寒更切  
鬢隨霜葉病先凋  
兒童失笑翁慵甚  
送客今朝却過橋

冬夜無寐書以自適

四壁摧頽手重泥  
一枝隨意即一作足  
成棲歸來已化千



年鶴老去慵聽半夜雞世事榮枯都是幻物情長短不

須齊寸心耿耿何人會隱几西

一作寒

窻月色

一作片月低此詩

河汾諸老詩  
集作段克己

### 用韻答封張二子

心如墮絮已霑泥身似驚禽未得棲壺缺何煩歌老驥  
冠成不復帶雄雞黃公遁跡終辭漢范蠡逃名徑入齊  
回首平生事堪笑少年豪氣北山低

### 和答丹山夢菴張丈

抖擻征衣衣上塵歸來白髮一番新剩將酒向愁邊酌  
却恐人嫌醉裏真世事飽諳惟欲睡詩情漫苦只能貧  
歲寒松柏東風外付與千林自在春

中秋之夕封生仲堅衛生行之攜酒與詩見過各  
依韻以答二首

萬籟聲沈暮靄收長河瀉浪洗清秋遙天千里澹如水

明月一輪光滿樓隨意傾銀成

一作課

勝賞誰家橫玉調

新愁可憐白首蟾宮客羞對嫦娥說舊遊

夜涼河漢靜無聲澄澈天開萬里晴蟾吐寒光呈皎潔

桂排踈影甚

一作極

分明良霄方喜故人共醉語那知鄰

舍驚一片詩魂招不得九霄直與月俱清

以上二首河汾諸老詩集

俱作設  
克已

### 跋秦得真墨

晴窗不用辨犀紋墨妙秦郎已飲聞翠餅瑩如鴉背淨  
玉圖香鄙麝臍薰永寧賜第今猶少易水無良古亦云  
老我媿非揮翰手兩丸投贈負伊勤

午芹道中

渺渺江風吹葛衣  
愛閒長與世相違  
青絲步障柳千樹  
碧玉屏風山四圍  
入眼江花如慰意  
近人沙鳥信忘機  
虛名到此成何事  
一笑平生始覺非

元日夜與二三子小酌

一樽相對夜如何  
却恨歸來白髮多  
萬事到今從鹵莽  
一年好處莫蹉跎  
閒收暮景供清酌  
醉挽春風入浩歌  
多謝東君不嫌客  
也教衰朽得陽和

幽懷用夢菴張丈韻二首

百年過眼半羈旅十日逢人九歎嗟  
叔夜不堪長抱病馮驩何苦久無家  
飄零身世風頭絮澹薄人情春後花  
擬把餘生釣江海為煩嚴子借魚槎

起來乘霧看年華便著芒屨待鹿車  
白水明邊鎔落日碧天盡處散餘霞  
決明點檢無多實甘菊商量有數花  
滿酌一杯都不計人間萬事足安蛇

自壽

霏霏晴雪點吟鬚  
颯颯秋風戀客裾  
計拙每為妻子笑  
病多還覺友朋疎  
行年如此事無幾  
破屋脩然家有餘  
濁酒一杯吾自樂  
人間富貴不關渠

雨後漫成

羈思紛紛不易裁  
晚涼扶病獨登臺  
翩翩幽鳥避人去  
殷殷輕雷送雨來  
已判此身閒裏老  
且將笑口酒邊開  
安車待聘非吾事  
休作姑山隱逸猜

再和

涼月娟娟玉半裁  
曉風吹夢下瑤臺  
笛兼鄰杵相和切  
秋共羈愁一并來  
到處溪山容我嬾  
違時顏面向誰開  
少陵可笑行藏拙  
獨倚危樓剛自猜

四和

林外炊烟細若裁  
詩情引上賦詩臺  
螢從楊柳梢頭墮  
雨向梧桐葉上來  
華髮蕭蕭秋更短  
衡門寂寂晝慵開  
終南佳處吾將老  
仕宦休為捷徑猜

五和

身世浮雲不受裁，羊裘重覓子陵臺。  
隨人明月娟娟靜，吹面涼風特特來。  
多技漫勞寧似拙，兩眉深鎖不如開。  
牀頭忘却糟牀酒，誤作蕭蕭夜雨猜。

乘興杖屨山麓，值梅始華，徘徊久之，因折數枝，置  
几側，燈下漫浪成語，簡諸友一笑云二首。

戲蝶遊蜂總未知，小窻低亞兩三枝。  
夜闌燈下橫疎影，渾似西湖月上時。

幽香不許俗人知，纔是東風第一枝。  
誤認文君新睡起，



讀書窻下立移時

梅花二詠

乞

漏洩春光洛水傍  
紫雲名字襲人香  
可能惠我黃昏伴  
休笑分司御史狂

鯢

玉骨那堪一作愁瘴霧傷  
好將經卷伴南荒  
坡仙鼻孔清

如水老覺朝雲道氣長

花木四詠

荷葉露

泉客將歸返故淵  
西風渺渺碧波寒  
主人情厚無他贈  
一把真珠泣翠盤

葵花日

戀戀天光下玉階  
明妃初出漢宮來  
情知生死歸無路  
一點芳心誓不回

菊花霜

六宮試手學梅妝曾見飛英點額傍香粉嚼餘濃不散  
唾花誤染縷金裳

芭蕉雨

憶別春容已十年回紋錦就倩誰傳都將一掬傷心淚  
灑向蠻溪數幅牋

龍門三題

雲中暮雨

古壘雲藏一徑微河山依舊昔人非貪徵往古興亡事

不覺城頭雨濕衣

此詩河汾諸老詩集作段克己

仙掌擎月

月出山頭未數竿  
仙人掌上玉團圓  
瑞光冷射三千丈  
絕勝碧蓮峯下看

汾水秋風

一曲劉郎發擢歌  
歡情未已奈悲何  
只今回首空陳迹  
依舊秋風卷素波

蒲川二詠

虞坂曉行

林外晨雞第一聲  
隴頭殘月伴人行  
未知局促鹽車下  
老驥蕭蕭又幾鳴

首陽晴雪

薇歌一曲對西

一作青

山萬古清愁

一作千秋

老翠巒望斷空

巖人不見光搖銀海玉峯間

一作寒

和李生湛然聞杜鵑有感之作

五更枕上夢魂清  
初聽催歸第一聲  
我本無家更安往

任渠啼血不關情

秋日出郭

離離禾黍滿郊墟  
棗實紅殷接野閭  
四十年來無史筆

有年今日仗誰書

一作張宇

送馮資深歸西山四首

人間蠻觸日干戈  
暮四朝三都一作能

幾何此一作歸

去莫

一作歸

憂鉗粟罄西山雨  
足蕨薇多

蕭蕭華髮老書生  
久欲歸田計未成  
喜聽日邊消息好

故山容得子真耕

幾

一作三

年消息

一作思慮

漫營營重見西山眼倍青胸次無

塵元自好牀頭况有洗心經

候門穉子喜歸來暖熱那無酒一杯抖擻滿身塵土盡

襟懷還對好山開

贈師巖卿

一作書師巖卿蒲中八詠圖

老大溪山入夢頻強憑圖畫寫情真歸與不及身強健

山有英靈恐笑人

題張郎中明皇小決圖二首

志在馳驅禍已胎  
笑顏況更為誰開  
貪爭飛鞚鞭騾去  
不覺踰垣有鹿來

天寶承平事久無  
弄丸驢背自馳驅  
不期一笑宮中戲  
傳作人間小決圖

周生景純贈菊數本因拾舊事依韻答之二首

陳國君臣醉宴時  
可憐璧月照瓊枝  
薔薇露濕仙裳重  
笑殢君王索好詩



萬里文姬去國時秋霜也到歲寒枝歸來滿面黃塵暗  
怨入西風馬上詩

題梁氏靜樂堂

攘攘區中人役心名與利於身竟何有乾沒不少置叔  
敬有耳孫聲聲與時異一官不肯覓閒居養高志築室  
塵境中中有塵外意方其厭囂嗽歸來行少暨牀頭一  
卷書淨洗紛華累苟能樂其樂寧復事吾事見客不吝  
情有酒即成醉為問東華塵何如北窻睡清風吹我懷

萬事覺無味誰知方寸間自有清涼地

蘇氏承顏堂

登仙不羨飛雙鳧宰官不樂紆金珠行年四十著綵服  
悲啼效作兒聲呱丈夫豈無四方志倚閭望望心何如  
家國無事壽觴舉慈顏得酒增和舒客來草具對客食  
殺雞奉母其賢乎榮華富貴固所願有子能盡如君謨  
至誠不動古未有悅親自得神明扶茁哉冬生孟林笋  
園焉日出姜泉魚古來孝感有如此今人蓋以古為模

嘗聞古有色難戒愛深容色何愉愉詩成不覺涕淚俱  
爾有母遺傷獨無他年誰作孝友傳請錄吾語為君書

題秋暮山行圖

亂山崒峩爭清妍寒林寂歷相繚聯人間黃塵千萬丈  
一點不到山林邊秋光澹薄秋氣爽浮雲積翠何蔥芊  
高風淒其脫木葉向來面目仍嬋娟江流一曲抱山麓  
孤舟斜日棲江湍行人何適來負擔腰膂蹇犖确石頭  
路蹇驢鞭不前人家前塗渺何許望之不及憂悁悁問

公何從得此本筆勢髣髴營丘傳我本山人見之心  
惘然嶽崎歷落真可笑對畫題詩思昔年

送孫仲文行臺之召

仲也何人斯不滿六尺長言議間英發入耳音琅琅胸  
懷湛秋水面目嚴清霜讀書及城旦寓迹鳬鷺行自公  
少餘暇婉愉奉高堂甘旨未及親有飯不敢嘗顏色或  
未怡綵衣戲親傍執喪三年中哀慕如新喪回思顧復  
勞此意何時忘日聞辟書下且喜還且傷捧檄念吾親

不覺涕泗滂拔英外臺選列布皆珪璋掾吏須幾人亦  
必求循良世人豈無才要以德自將糾摘誰弗能吾心  
恐無常詩人有明誠茹柔吐其剛孝為百行先子孝吾  
既詳苟能推此心前路未易量慙慙養雲翼行矣勿息  
忙

醒心亭

窻前流水玉泠泠窻下高人酒半醒喚省邯鄲枕中夢  
如看王湛案頭經脩然自得天遊趣恍若那知地境靈

說似功名場上客倦遊時節一來聽

跋三堂王自寫真

解衣盤礴真畫史不待濡毛知可矣葛巾草服嘗畫我  
意欲置我山巖裏虎頭於今幾百年與渠誰後復誰先  
脩然蛻跡乘風去一笑相逢喜拍肩

御訂全金詩增補中州集卷五十八

# 欽定四庫全書

集部

御訂全金詩增補中州集卷五十九

詳校官中書

臣張虎拜

主事銜

臣

徐以坤覆勘

總校官編修

臣

王燕緒

校對官編修

臣

勵守謙

膳錄監生

臣

黃嘉績

欽定四庫全書

御訂全金詩增補中州集卷五十九

段成已下

以下從二妙集補入

壽夢菴張信夫

一杯瓮頭春持壽丹山客洗盞至客前共坐林下石酒  
酣語益真道合意自適東風吹醉眼高興寄空碧人生  
天地間迅若駒過隙胡為就羈縛惴惴從物役何如夢  
室中一笑百憂釋棄置勿復道放懷陶茲夕



誄雙峯興上人

堂堂雙峯師不受塵世汙禪坐三十年俯仰無愧處平生大事畢欲留不可住適來水中漚水行漚復聚適去火上烟烟散火如故徜徉天地間去來隨所遇我懷未能忘正坐分別趣涕餘會真心三嘆出門去

贈呼延長原

我來負犢顛投迹汾水濱亂餘寡儔侶所遇皆所親一行未易完忍更求其純矯矯呼延生棟宇接近隣雖云

符詛師頗異尋常人疾苦在力救貴賤情一均功成不  
責報第恐傷吾仁曠懷寓杯酒不計醕與醇一酌萬事  
畢肝膽平輪囷酒酣奮長袖滿坐生陽春人皆笑汝狂  
我獨愛汝真參苓我所須收為藥籠珍吾聞先天術原  
委有本因後人罕知學莫復窺其津華陀起東漢扁鵲  
名西秦二君本儒者卒以醫自神願生繼高躅勉勉勿  
因循

贈研師寄寄翁

有客抗塵容不知何人斯自云來西秦著脚汾之麋放  
浪三十年野鹿不受羈是身寄虛空歟若駒隙馳竄名  
書研間聊寄吾寄為遊戲出三昧我豈甄陶師心成應  
之手觚指各異宜萬象且胚渾一一非人私妙凝天地  
中不覲亦不坏探懷出蒼壁炯炯光陸離摩挲湛秋水  
隨手生寒漪雖鑿混沌竅大朴猶未漓回首銅臺瓦千  
載垢有餘坐令呂與張羞受牛後嗤便當什襲藏奚必  
古見奇待價不求售持易詩人詩卷餘兩牛腰得之猶

恐遲歸來飯甑空一字不救飢咀嚼誑枯腸似高還似  
癡障簾與蠟屐優劣孰等夷不如且置之安事屢解頤  
翁聞為一笑此事非所知苟可適吾欲君詩不當辭

刁少府優善堂

取人戒不周取善戒不遺理能兼衆美何必勞營為奈  
何當塗人好以智自私身勤事仍左終日徒紛披君侯  
本將種磊落真男兒延英闕賓館下問質所疑優善題  
其堂美意良可知永懷正子賢千古猶一岐休休好善

心一出忠厚資片善或可不厭蓬茅卑人輕千里遙  
願吐胸中奇投誠盡實理入耳無諛辭從容談笑間萬  
事無不宜三年報政後齷齪何其遲潛令十萬家共照  
晴春曦退食坐南堂何慮復何思

送張世傑赴京兆幕官

雨雪方載塗霜風裂膚肌丈夫四方志遊子千里期簡  
書豈不畏孀親髮如絲恩義兩相奪欲行還遲遲世榮  
豈不慕此心難遽夷大分既有定僂俛安得辭伊人遇

知己第恐負所知去去勿重陳搏扶良自茲苟能以義  
養猶足慰親思

馮生成之自燕歸平陽賴寂照先生獲脫奴役復  
齒士列將復歸燕主吾友濟夫來謁詩姑序其概  
以答云

英英大馮君雅志在千里坎窞不得前而姑止於此出  
處雖兩塗動靜無二理燕坐三十年初不離朝市了了  
方寸間湛然若秋水馮生適何來眉目差可喜自云衣

冠後家破偶不死失身坑阱中搖尾凡幾襁過者日千  
萬貌馬不一止忽逢盤谷翁引手惟力致力極勢未回  
既出幾復委不知何因緣得入先生耳一見不忍遺即  
命加冠履奴僕宜所安推已乃知彼惻然動於中棄金  
猶棄批少辱豺虎場永謝泥與滓乞詩答盛德此意良  
亦美顧我欲何言一笑不知已先生世外人於汝初何  
埃苟能堅一心綺語奚足恃屈信固有時此正在知已  
勿如越石父以是驕晏子

楊生深甫以鑿鳴河汾遜菴先生以下皆贈以詩  
生吾黨士也觀其意似不以淺近自期者故余之  
所述不特稱道而已也

楊生頭角非凡子少以鑿名動州里胸懷了了中可人  
容貌恂恂外如鄙前徽未艾足憑藉論議滔滔有原委  
人身造化一天地敢謂精微盡於此中情翫翫不自安  
願就先知問其旨遜菴先生天下士挈攜陬維為指似  
古人由此不難到但恐中心復中止千金再拜一言重



採掇方書究終始姓名會看滿人間滾滾西馳若汾水

送賈德遠北上并序

生親老家貧輟晨昏定省之養以入京師其心將以  
有所得而歸為親榮也雖其親之心亦然而一身之  
勞故不暇計忘勞以悅乎親生之志也若生者其以  
義養者與於其行乞言以為別吾老矣言不見用於  
世雖無言顧於生何缺生意益堅而無倦色姑序其  
事以慰其行云

賈生歷落非庸子坐守窮廬足文史山田磽确無百畝  
日課諸郎力耘耔瓶儲顛倒得幾何晨夕安能具甘旨  
抱關擊柝有不擇智效一官聊爾爾霜風栗冽歲云暮  
水宿山行二千里及親而仕古所樂敢以崎嶇憚行李  
明年花發望君還綠戲階庭為親喜

贈答詩社諸君

賣藥韓康伯能詩張志和真銅須百鍊明月要重磨眼  
底如君少間中得子多兵連猶未斷莫厭數相過

漫成二首

一榻了窮冬吾生豈易供  
儘教人笑拙最苦客妨慵  
無寐間欹枕忘言醉倚筇  
可憐猿與鶴歲晚肯相從  
時序驚何速形骸強自持  
整冠毛屢脫束帶孔頻移  
蹭蹬成空老吟哦不救飢  
百年行已久一笑欲何之

和答木菴吳粹中

四海疲攻戰餘生寄寂寥  
花殘從雨打蓬轉任風飄  
有興歌長野無言立短橋  
敝廬獨在眼不覺路途遙

送王子壽之平遙二首

宿靄添行色晨鐘戒傲裝去期何太迫別語不成章戲  
綵憐文度扶衰賴孟光臨汾一卮酒目斷隴雲長

識面時何晚論心分已深相期同卜築豈料遽分襟別  
日宜加飯因風莫吝音家山有成約閒健早來尋

壽李濟夫

夫子何為者昂藏不入時眼前諸事罷膝下兩兒嬉落  
落真難合悠悠聽所之黃花一杯酒歲喜與君持

蕭少府挽詞并序

隰倅蕭君余不識其何如人也余初入城府謁余於  
客邸敝衣敗絮眇然一寒生爾爾後時時於朋游中  
見之貌益恭氣益和與之言確乎有守而不踰乎中  
其加於人豈一等也一日卒於平陽之學舍府僚張  
侯而下皆有挽章吾友公度邀余同賦義不可辭且  
蕭君母氏在堂臨年而失賢子行道之人聞之為之  
出涕以相其哀焉况平昔嘗所往來者為出一章以

弔但辭鄙義拙不足以發明蕭君之德業例奉總帷  
以黷為愧

蘭杜摧芳不待秋令人灑淚怨靈修門前弔客多青眼  
堂上孀親半白頭共說才華為衆許豈期仁義是身讐  
一杯冥冥重泉土野老相傳說故侯

和師巖卿遷居之韻

君看行路古來難木鳥其間得小安三窟未成那用狡  
一枝粗穩不須寬破除夢境原無國收拾詩盟舊有壇

秋菊春蘭俱可喜等閒乘興一憑欄

伯和告別北邁欲得一言以資行橐惓惓之意蓋  
不能違也病臥中殊無好懷漫此以贈

聽唱離歌一再行翩翩裘馬戒晨征據鞍耿耿壯夫志  
去國遲遲遊子情野店人稀休奠枕山蹊路險莫貪程  
一鞭行色西風順萬里秋空片鷁橫

李公子誕日賦詩為壽

歲晚喬松蓋倔強幾經風雪幾冰霜鬣毛不與秋同老

名字長隨菊共香  
堦下芝蘭相照映  
人間岐路極微茫  
願君叅取東坡意  
有病安心是藥方

張提舉子華報政中臺賦詩為餞  
第荒淺良愧也  
廟堂遣使出分巡  
撫養遺黎尚舊人  
今日不虛前日舉  
去時仍是到時貧  
一心耿耿公家務  
兩鬢蕭蕭驛路塵  
鞭策自君家世事  
蹄涔未足騁騏驎

送婁郎秀實北上

氣壓元龍百尺樓  
搏空鵬鷃正高秋  
珥貂自屬封侯相



借箸咸推決勝籌會計不勞談笑了功名未肯等閒休  
并州豪俠風流在慚愧儒冠漫白頭

壽李濟夫

往來詩酒晉城間白日相看尚昔年鳩卜一枝如我拙  
驥思千里屈君賢牀頭文史猶堪樂眼底芝蘭正可憐  
但願太平身健在西風長醉菊花前

辛丑清明後三日詩社諸君燕集於封仲堅別墅  
談笑竟日賓主樂甚然以未得吾兄弟數語為不

足既而遜菴兄有詩余獨未也主人責負不已因賦此應命云

燕子歸來人未歸平生事業與心違  
天翻地覆春仍好雨打風吹花又稀  
淡抹平林烟冉冉亂飄香雪絮霏霏  
可憐光景誠虛擲坐對虛罇到夕暉

寄題張氏雄飛亭

大署佳名揭棟甍相君英氣見平生  
心隨燕鴈共千里志效齊禽眇一鳴  
昭代誰人飛鶚表滄溟何日縱鵬程

會乘風便扶搖去但恐垂天翼未成

紅梅

淡掃胭脂碎玉團天生異物著江干月邊標格嬌增韻  
雪底精神巧耐寒春意底應容易見人情還作等閒看  
可憐棄置蒿蓬外倚杖東風鼻一酸

寒食後有感而作

二月山城尚薄寒冬衣未解嘆衰殘賞心更比年時減  
酒量全非舊日寬點點花隨春共老悠悠詩與夢俱闌

此身只合山間了勲業何勞鏡裏看

送史生仲恭北上

裘馬翩翩事遠遊少年豪舉氣橫秋  
愛君早有四方志為我能無一日留  
擊筑悲歌增感慨倒瓶濁酒浣離憂  
他時相憶勞回首何處風沙認晉州

仲堅將去平水啟行之夕會飲於史氏之山齋

得子膠膠擾擾間往來未熟各衰顏  
百年更有幾回醉一月都無數日間  
不放肝腸中白墮將何面目對青山

相逢且盡今宵樂明日紅塵復市寰

寮居偶成

赤手誰能捋虎鬚溪山好處颺輕裾頭顱久覺非侯相  
顏面從教與世疎一榻清風塵土外半軒黃菊雪霜餘  
明經自為兒孫計敢與鴻儒論石渠

湛如古井冷無波鈍若吳鉤澁未磨半紙功名蝸左角  
百年身世蟻南柯天翻地覆親曾見暮四朝三都幾何  
萬事轉頭供一笑向來事業盡蹉跎

用韻答封張二子

有斤誰斲鼻端泥借榻聊從地主栖  
萬事成虧均野馬半生癡黠類醯雞  
文章自笑非時樣道德空期與古齊  
老懶正宜閒處著高名無用不如低

再用前韻

勞生擾擾燕分泥常逐東風到處栖  
止渴望漿那及酒供炊無米敢言雞  
仙人墮淚空辭漢處士為書已贊齊  
陋巷自無車馬到衡門從此不嫌低

再用渠字韻

兒女憐翁競挽鬚侯門何事曳長裾功名于我非所願  
風月與人良不踈絳灌自能扶漢業綺黃只合老秦餘  
耳根一洗塵囂淨瀟瀟寒泉玉漱渠

和答丹山夢菴張丈

幸自無人識姓名忍將兩腳鬧中行元從有我安排了  
強欲趨時作麼生案上一編聊慰眼世間萬事不關情  
此情惟有沙鷗信來往江頭自不驚

翌日二子見和復用韻以答三首

短髮蕭蕭散不收  
老來何事更悲秋  
常年有酒或無月  
今夕乘晴好上樓  
休對嬋娟談往事  
祇將笑語替清愁  
冷光願照金罍裏  
記得開元太白遊

忽聽城樓暮角聲  
飛空片月快新晴  
雲烟斂跡無纖滓  
星斗收光不敢明  
千里共看人已老  
一枝難穩鵲頻驚  
醉吟坐到三更盡  
病骨不禁秋氣清

香霧霏霏晚漸收  
冰輪碾破一天秋  
便邀東海騎鯨客



同上西家賣酒樓不向此時拚一醉更於何處散千愁  
年年人月如今夕永結無情汗漫遊

丁未立春日與彥衡景純史生飲座中彥衡有詩  
且需余和為賦此

花枝摘索費詩催自笑吟懷老未灰白髮漸如殘雪滿  
朱顏不逐早春回可人襟韻來三客入眼風流欠二梅  
有酒間身強健在莫教閒却手中杯

翌日再用前韻簡二子

長吟未老雨來催雪積寒爐火漸灰一點枝頭紅尚淺  
半痕溪面綠初回行擔酒債還思杜坐得詩窮大笑梅  
報答風光無好語對時虛覺費清杯

獨坐有懷往昔復次前韻二首

短髮刁騷不受催坐看浮世幾飛灰流年冉冉人空老  
往事悠悠首重回天遠望窮歸去鴈地寒瘦損折殘梅  
等閒無計驅愁得除向壚頭試一杯

快飲休嗔急管催昔人不飲已成灰轉頭晚景無多子

屈指春風又幾回撥悶直須煩麴蘖和羹宜且置鹽梅  
莫言兩手渾無用花下猶堪把酒杯

衛生行之少負俠氣與余兄弟相遇於艱難之際  
自抑惴惴常若不足迨今十年矣家貧而益安豈  
果有所學乎不然何其舍彼而取此也生正月十  
六日誕彌日也因賦詩以贈為一笑樂且以堅其  
志云

低心不肯逐時趨坐覺瓶儲歲屢無試手耕紉新事業

傳家弓冶舊規模  
膝前癡騃憐文度  
酒後麤狂憶阿奴  
生弟襲之嗜酒而狂生每容之  
但願年年身健在  
一罇長得與君俱

再用杯字韻

綠髮潛為白髮催  
賞心半逐壯心灰  
已拚事業因循却  
又放風光寂寞回  
春意等閒遺病木  
曉寒特地妬芳梅  
病來止酒人應笑  
忍耐良辰負此杯

人間聲利任渠催  
烈焰何嘗發死灰  
世態翻雲悲易變  
年華如水挽難回  
驚心舊曲空聞笛  
點額新妝不見梅

百轉拈腸思一溉虛名方信不如杯

送李山人湛然之燕

驚塵浩浩塞雲寒珍重儒冠莫浪彈相府豈能容阮籍  
館人那解識馮讎無書可上裘空敝有夢難通刺欲漫  
且好駐君千里駕小齋如斗足容安

戊申四月書於史氏仲恭別業

飄飄天地一癯儒問柳尋花未要扶老去生涯三徑在  
向來意氣一分無樽前乍喜潮紅頰鏡裏那知雪滿鬚

睡起北窗成一笑人間歧路足崎嶇

漫書二首

山翁只合坐山房四壁蕭然一木牀  
心為感時空渺渺鬢因懷舊變蒼蒼  
人間日月驚何速物外光陰本不忙  
一枕北窗眠正穩却疑身世在羲皇

擾擾膠膠人自忙心閒無地不清涼  
雨邊戰陣蚍蜉鬧花底生涯蝴蝶忙  
幸有文書遮老眼豈無藜苳療飢腸  
從教門外蓬蒿滿不見白丁計亦長

五月肱日書以自適二首

隴月娟娟白板扉  
溪風颯颯冷麻衣  
藜牀坐穴人空老  
鐵硯磨穿計已非  
叔夜自難堪作吏  
李膺那解早知機  
但教方寸常無事  
一酌清泉亦自肥

身貨休論兩孰多  
留連光景且婆娑  
穀臧得失不相遠  
蠻觸功名能幾何  
悶後徑尋醅瓮飲  
醉來慵擊唾壺歌  
扁舟舊有江湖趣  
須把藍衫換一蓑

次韻周景純先生見寄之作

閒尋閒計適閒情日月催人慨易傾  
築室未能依表聖  
卜隣先喜得君平  
慚非世用甘藏拙  
謬得時稱豈是誠  
我與西山相信久  
不須更與白鷗盟

幽懷用夢菴張文韻二首

此懷耿耿付東流  
蒲柳形骸不耐秋  
老去始知身世幻  
病來漸覺鬢絲稠  
青蠅點物驅還至  
白鳥猜人挽不留  
收拾閒愁共晚睡  
西風吹夢冷悠悠

自嘆行藏久謬悠  
多君雅志在林丘  
一生斷向閒中老



百計何勞分外求總把行年償酒債更將餘日費詩籌  
膠膠擾擾人間世一笑樽前萬事休

封仲堅挽詞三首

幾年為我駐行輶一閉幽宮挽不留望望故丘君飲恨  
煢煢遺息衆為憂皇天無路申三問隙地何人借一杯  
重對平時舊遊處野烟荒草祗增愁

藏身無地古難堪賻葬何人為脫驟伯道可憐誰主後  
緹縈猶在勝生男十年往事如春夢千古遺經憶夜談

一片羈魂招不得暮雲黯黯冷幽龕

昔常屈指計前期今守窮廬竟死為多病每慚調護力  
餘生誰救急難時匠斤欲運莊周泣隣笛遙聞向秀悲  
一片嵌巖磨不磷更堪重讀孟郊詩

薛寶臣生朝

曉砌初開十二莢一樽介壽為君傾昔聞存義能從政  
今見元欽又繼兄謝傳階前瓊樹秀老萊堂下綵衣輕  
莫言小邑徒勞耳萬里青雲第一程

送張器之北上二首

匹馬翩翩出漢關  
春風塞草幾芊綿  
人憐季子貂裘敝  
自誓桑生鐵硯穿  
羊角會搏溟海上  
鴻毛行遇順風前  
吾軍正賴君增氣  
萬里青雲穩着鞭

眯眼風沙去路迷  
又攜書劍過山西  
片心耿耿摧尤壯  
六翮翩翩養後齊  
千里會看黃鵠舉  
一枝休嘆彩鸞栖  
丈夫自有乘車日  
司馬橋名不浪題

蘭氏晚節軒二首

幾年會計屈微官五斗才堪給酒錢  
野鶴風標寒愈峭巖松節目老方堅  
石腸未省隨時轉鐵面何嘗與世妍  
回首風烟三徑晚典刑當作畫圖傳

都把升沉不置懷一罇時對好山開  
張公雅有江湖志崔子本非丞貳才  
為政從渠咄咄官買田已自賦歸來  
高情想像常如在不逐春風沒草萊

贈醫者

術以醫名行以儒為人不肯著方書  
共高世外封君達

自許山中陶隱居掉手恥為他日討論心羞未古人如  
有兒還解傳家否試問門前長者車

壽尊兄遜菴先生

筆頭風雨幹千鈞早歲嘗充觀國賓避事就閒真得計  
有才無用且藏身虛名到底將安濟涉世而今不厭貧  
白髮相看老兄弟暮年同作太平人

送王載之

鞍馬今年事遠遊北州未穩復南州胸懷落落馮驩缺

塵土翩翩季子裘擊筑悲歌增感慨  
倒瓶濁酒浣離憂  
一編笑我衡茅底坐送光陰到白頭

雨後漫成

詩情牢落不堪裁人物風流愧玉臺  
門外寂無肥馬到  
枕邊剩有好山來年華滾滾身如幻  
世事膠膠眼倦開  
擬把餘生寄江海沙頭鷗鷺莫驚猜

再和

癭杓天然不用裁日傾新醞剝蓮臺  
幾回醒酒風纔過

一霎催詩雨又來兩脚只堪閒處着寸心贏得片時開  
此身有類傷弓鳥曲木無情亦暗猜

三和二首

壯志如今日搏裁功名不復夢雲臺半生回首事安在  
一葉驚心秋又來不引壺觴聊自勸未知懷抱若為閒  
浮名畢竟成相誤盍作閒居鶴毒猜

世事紛紛巧劃裁何如無事醉春臺脅肩一笑亦良苦  
有田幾時歸去來百念都隨灰燼冷一罇聊為聖賢閒

從今便入農桑社園友溪翁莫見猜

四和

嘗把閒身靜品裁殘生何幸脫興臺田園依舊喜重到  
松菊就荒傷獨來懶散從教塵事廢襟懷難對俗人開  
自量不肖非逋客為報山靈且莫猜

五和

樗櫟無心入匠裁姓名不列郭公臺閒攜藜杖看雲度  
靜掃松軒待月來未把酒杯頭懶舉試拈書冊手慵開



荒才自信非鄒樂安處青山有底猜

題七賢圖

七賢不與竹林期人物風流各一時妙語霏霏皆作者  
高懷落落更安之山川如畫靈猶在溟渤飛塵世屢移  
欲薦菲辭無處問黃流千里夕陽遲

贈琴士任先生

條然天地一癯仙誤落紅塵二十年萬事成虧雲過眼  
一身蹭蹬雪盈顛支頭欲寫卷中趣洗耳試聽徽外絃

他日遂君林下約月明風露淨涓涓

樂郎中萱春堂

共道傳家以義方長留春色在萱堂  
靜宜有壽何須祝樂自無憂不待忘  
華萼光輝連二妙瑤林照映列諸郎  
要看腰笏牀俱滿歲月靈椿未易量

容菴

走遍人間行路難歸來始覺此身安  
半椽自覆人應笑兩膝足容我已寬  
階下蘭生猶可佩籬邊菊老儘供餐

微軀此外無餘事一炷清香篆曲盤

總管隴西公歸自趙城以雪途行役見命賦此以

獻

曉鞍催發五更鐘王事匆匆不易從雪氣空濛迷馬首  
霜威跋扈襲裘茸誰家村落雞頻唱到處園林鳥絕蹤  
却憶雲山舊栖地擁衾高臥養吾慵

萬夫長李侯西覲回作詩為賀二首

帷幄雍容擁萬夫雄襟英概漢臧吳獠兒坐失重巖阻

戰士爭先九折驅去日旌旗填蜀道歸時笳鼓競堯都  
謬為門下登龍客擬頌勤勞愧腐儒

坐擁貔貅十萬夫雍容帷幄看投壺威風栗烈前無敵  
膽氣輪囷大滿軀銅柱直期標百粵連城潛覺失全吳  
江南公事行將畢願獻扁舟范蠡圖

乘興杖履山麓值梅始華徘徊久之因折數枝置  
几側燈下漫浪成語簡諸友一笑云

漏洩春光人未知輕紅已透最高枝洗妝自有天然態

儘道冰容不入時

光德道中

行行不覺到斜陽  
顧影頻驚爾許長  
返照此身還此是  
莫因外景便承當

和答陳子京二首

擾擾浮生等聚嬉  
風波千丈渺無涯  
掩關一卷牀頭易  
冷眼從渠笑絕癡

雲山咫尺阻同嬉  
望斷音容天一涯  
聞道城居最堪隱

想君為計未全癡

梅花咏七首

憶

初謁瓊漿記昔年迎門一笑想嫣然  
夜來雪暗前村路恨滿東風意不傳

夢

神女塵緣久未忘飄然隨月到高唐  
歡情未接還驚覺雲雨陽臺空斷腸

尋

玉想形容霞想裾雲英自與世姬殊幾年來往藍橋路  
搗盡玄霜得見無

探

未嘗親到謝家堂風韻何由識謝娘說與選花場上客  
須知林下勝閨房

浸

洛浦飄飄信有神凌波忽覩一枝春摩挲老眼看微步

旖旎香生羅襪塵

浴

洗盡鉛華見玉環  
肌膚冰雪照人寒  
臨風脉脉嬌無力  
輕裊香羅半未乾

惜

襟袂脩然風味酸  
北人誰識蔡姬賢  
可憐拋却清伊月  
埋沒邊沙二十年

花木咏四首



海棠風

宿酒微醒不自持  
君王催喚太真妃  
醉紅睡起依然在  
忙倩羅紈為解圍

楊柳烟

九原喚起李夫人  
誰炷仙香為返魂  
一捻宮腰渾瘦損  
舞衣微帶瑞雲痕

梅花月

別後盟言不忍寒  
舊官到底勝新官  
情緣未斷還相見

人復團圓鏡復完

山茶雪

飄飄天上謫仙人嘗作金鑾侍從臣  
老大風流殊未減  
錦袍如舊白頭新

龍門五題

禹門雪浪

峽束洪流起怒濤  
翻晴雪與雲高  
徐看行處元無事  
小智區區枉用勞

疏屬晴嵐

雲拖殘雨斂前峯翠色寒光溢幾重應有詩人偏着眼  
時施膏沐為渠容

雙峯競秀

雲外亭亭聳翠環天荒地老兩峯閒若教工部常經眼  
未肯將詩譽玉山

神谷藏春

山間草木四時春一脉清溪不染塵忽見漁郎驚借問

却疑儂是武陵人

姑山夕照

日鎖羣峯欲下遲  
龍葱一片冷胭脂  
醉吟著我扁舟尾  
畫出坡遊赤壁時

蒲川六詠

蒲津晚渡

城下行舟一箭輕  
城頭落日半竿明  
河流洶洶風仍急  
時聽浮空欸乃聲

舜殿薰風

煩暑人間不可支  
暫來舜殿獨逶迤  
南風一拂清如水  
猶似當年解愠時

東林夜雨

烟雨濛濛古梵林  
庭院深悄若無僧  
林梢一點熒熒碧  
知是層樓供佛燈

栖巖疊巘

山色紫青不染塵  
何年精舍構嶙峋  
也知偏入閒人眼

為現雲間清淨身

為內夕陽

為水橋邊日下遲  
龍葱一片冷胭脂  
山川良是風猶古  
想像英皇下嫁時

王官飛湍

冷雲深處漾寒清  
千仞懸流玉練明  
車馬往來山下路  
何人到此濯塵纓

幽居奉藉遜菴尊  
兄嚴韻呈隱之潤之二英弟一

聚三首

解鞍藉榻避氛埃  
淨拂風軒待我開  
詩句墮前還忘却  
聊書歲月記曾來

浮榮過眼等浮埃  
罇酒相逢一笑開  
門外紅塵高萬丈  
莫教一點鬢邊來

小軒如斗靜無埃  
面向青山好處開  
漫道幽人招不得  
一樽今日為君來

張信夫夢菴四首

并序

子張子寓跡於里西之精舍以夢名其室且命余訂  
之夫人之方夢也念念相因萬境現前一得其意則  
揚眉軒目傲然以為樂一失其意則喪神沮氣愁悴  
以為憂昏昏沒沒冥行於夢境之中初不知夢之為  
夢也惟其不知也故為憂樂之所汨及渙然而覺始  
知向之汨吾心者之虛妄也世之人貪得而患失廢  
精神耗思慮終日弊弊焉顛倒錯亂於憂樂之域而  
不自覺悟者庸非夢耶蓋寐者斂睫之夢也寤者瞠



目之夢也是以達人大觀寤寐兩忘雖視其身猶以  
為夢幻況區區之物烏足累其心哉姑作是詩而為  
之獻亦以自釋爾

憶昔邯鄲道上行半生回首夢初驚而今始覺非真實  
過眼浮雲萬事輕

覺時常笑夢時訛夢覺其間爭幾何聊爾藏身大槐國  
間看明月上南柯

一身相相復蘧蘧為蝶為周我自如寤寐人間等遊戲

此心無地不華胥

世味迷人人不知紛紛蕉鹿競爭為山翁正坐山堂上  
笑問黃梁第幾炊

和楊彥衡見寄之作六首

幾年奔走起槐黃兩脚紅塵驛路長夢破邯鄲成獨笑  
半生回首只空忙

西風浩浩塞塵黃白髮綠愁若個長客夢五更驚忽斷  
打門縣吏索租忙

一裘誰為製玄黃無可奈何秋夜長我自忍窮方未暇  
不知蠻觸戰爭忙

一葦初航十里黃故園歸計渺何長可憐兀兀青燈下  
還似當年舉子忙

小園蔬茹待秋黃不事薑鹽味自長口腹累人良可笑  
可能終歲為渠忙

幽跡無心學綺黃荒才涉世本非長年年來往燕然道  
卻為山林有限忙

古瓶梅花

錦帳銀瓶浸玉肌  
風流應自有人知  
夜深窗下橫疎影  
絕勝西湖月上時

徽宗墨竹

野禽背立歲寒枝  
想見當年落筆時  
吮墨綴辭俱喪國  
九泉笑殺李家兒

蘭氏自然齋

萬事榮枯一笑間  
情知使尼定誰關  
編茅依石寬如斗

臥看溪雲出岫還

張世傑經歷牧牛圖三首

綠陰深處戲童兒  
牛自東西兒不知  
休說兒狂無伎倆  
人間何事不兒嬉

斷烟荒草澹無姿  
寫出人牛自在時  
毀瓦一歡聊爾耳  
不知何者是盈虧

兒自嬉遊牛自眠  
葛洪磯畔舊因緣  
三生石上精魂在  
一夢回頭又幾年

楊茂之志適軒二首

坐嘯行吟困即眠  
心遊隨處莫非天  
是中真意何人會  
隱几蓬窗正嗒然

人心自有一羲皇  
說着元來話更長  
詩句墮前還忘却  
坐看林影轉虛廊

秋日牡丹為友人賦  
病久無佳思  
姑作俳語三章  
以應命對觴一軒渠可也

訴盡中情在兩詩  
可憐誰識漢文姬  
歸來已覺秋風晚

標格猶應似舊時

秋雨瀟瀟無限思  
妄憑羽客覓環兒  
蓬萊日月非人世  
不記梧桐落葉時

公子初離季隗時  
丁寧私語兩相知  
從渠歲律春秋變  
一點真心死不移

暇日意行姑射山下  
奉藉遯菴先生聽雨堂韻簡  
詩社諸君

散策步幽巖所遇良  
可喜戀戀蝶遶衣  
涓涓泉入耳俯


仰天地間一物莫非已  
暄妍坐閱春事芳飄飄  
思與春雲長呼兒置酒  
飲花下風來滿袖攜花香  
白白紅紅紛澗谷恍然  
身世如河陽東風吹落山  
頭雨山鳥催歸共人語  
拂苔便欲枕流臥却恐  
傍人笑孫楚眼看六合塵  
土滿歸袂翩翩去何所  
乘風便擬凌青空人間  
無處尋方蓬

附虞集河東段氏世德碑克已成已之幼也禮部尚書趙公秉文識之目之曰二妙成已登正



大進士第至宜陽簿及內附朝廷特授平陽提  
舉學校官不起而克己終隱於家一時諸侯大  
夫士皆尊師之各有文集數十卷

附段輔二妙集後誌顯祖遜菴君與從祖菊軒  
君才名道業推重一時值金季亂亡辟地龍門  
山中遜菴君既沒菊軒君徙晉寧北郭閉門讀  
書餘四十年優游以終凜然清風視古無媿其  
遺文惜多散逸所幸者古律詩樂府數百章



御訂全金詩增補中州集卷五十九